



## Komunikadu Imprensa

15 / 04 2013

### JSMP hala'ó treinamentu iha Eskola Sekundária Nú. II Villa Nova Baukau

Iha 13 Abril 2013, ekipa JSMP ne'ebé konstitui hosi Unidade Peskiza Legál (LRU) no Programa Observasaun Parlamentu (POP) hala'ó treinamentu iha Eskola Sekundária Nú. II Villa Nova Baukau. Estudante hamutuk 30 mak partisipa iha treinamentu ne'e. Estudante sira kompostu hosi estudante Siénsia Naturál no Siénsia Sosiál tinan datoluk ka terseiru anu nian.

Materia treinamentu ne'e iha sesaun rua. Sesaun dahuluk ho títulu “**Demokrasia iha Timor-Leste**”, ne'ebé responsabiliza hosi unidade POP no sesaun daruak ho títulu “**Sistema Justisa**”, responsabiliza hosi LRU. Objektivu treinamentu ne'e mak atu hasa'e koñesimentu estudante sira nian no habelar informasaun kona-ba demokrasia no sistema justisa iha Timor-Leste.

*JSMP espera katak treinamentu ne'e bele hasa'e no hakle'an liu tan koñesimentu estudante sira nian kona-ba demokrasia no sistema justisa Timor-Leste nian ne'ebé sei iha prosesu konstrusaun no konsolidasaun nia laran, dehan Luis de Oliveira Sampaio, Diretór Ezekutivu.*

Iha sesaun dahuluk nian, treinadór esplika ba estudante sira kona-ba lala'ok Estadu demokrátiku, Konstituisaun, kna'ar órgaun soberanu sira nian, prosesu halo lei no partisipasaun públiku nian iha prosesu foti desizaun polítika. Iha sesaun daruak, treinadór esplika ba estudante sira kona-ba lei, tribunál no instituisaun relevante sira seluk hanesan Ministériu Públiku, Defensór Públiku no polisia, inklui tipu krime sira.

JSMP subliña katak setór justisa nu'udar pilár importante iha país demokrátika hodi hametin direitu sidadaun nian, administra justisa, tesi lia no fo justisa tuir lei no mós Konstituisaun haruka. Aleinde subliña mós katak tribunál sira hanesan meu no podér lejítimu iha órgaun judisiál hodi asegura no koopera ho órgaun soberanu sira seluk hodi kumpri no asegura protesau ba ema nia direitu no kondena sira ne'ebé kontra lei no viola ema seluk nia direitu.

Estudante sira haksolok tebes partisipa iha treinamentu ne'e. Adjuntu Diretór ba Kuríkulu, Sr. Titus hato'ó agradese wa'in ba JSMP tanba bele fahe koñesimentu no informasaun ne'ebé nia haree katak mestre sira rasik mós balun seidauk hatene. Nia hatutan tan katak sira nia odamatan nakloke nafatin ba JSMP no ONG sira seluk ne'ebé hakarak hala'ó treinamentu ne'ebé hanesan ka kona-ba asuntu seluk iha sira nia eskola.

JSMP espera katak estudante sira ne'ebé tuir treinamentu ne'e bele habelar tutan tan informasaun ba sira nia maluk estudante sira, nune'e mós ba públiku iha jerál kona-ba demokrasia no sistema justisa Timor-Leste nian.

Atu hetan informasaun kle'an liu tan favór kontaktu:

Luis de Oliveira Sampaio  
Diretór Ezekutivu JSMP  
[info@jsmp.minihub.org](mailto:info@jsmp.minihub.org)  
Telefone: 3323883 | 77295795  
[www.jsmp.tl](http://www.jsmp.tl)  
FaceBook : jsmp.timorleste